



## Komunikadu Imprensa 10 Marsu 2023

### **Partisipante Suku Uma Quic primeiravés simu treinamentu kona-ba asesu ba justisa no prevensaun ba violénsia bazeia ba jéneru**

Iha 08 Marsu 2023, JSMP realiza treinamentu ba Estrutura Suku no comunidade balun iha Suku Uma Quic, Postu Administrativu Vikeke, Munisípiu Vikeke. Partisipante sira ne'ebé partisipa iha treinamentu ne'e kompostu husi xefi aldeia, delegada fetu, joven fetu no joven mane. Totál partisipante hamutuk ema na'in 20 ne'ebé kompostu husi fetu 15 no mane 5.

Materia ne'ebé apresenta iha treinamentu ne'e kona-ba asesu ba justisa formál, definisaun violénsia doméstika, Lei Kontra Violénsia Doméstika (LKVD), prosesu legál no oinsa atu refere kazu violénsia bazeia ba jéneru tuir prosesu justisa formál.

Objetivu husi treinamentu ne'e atu habelar informasaun no hasa'e koñesimentu membru estrutura suku no comunidade sira nian kona-ba violénsia bazeia ba jéneru no prosedimentu kazu iha justisa formál.

"JSMP konsidera treinamentu ne'e importante tebes no presija kontinua habelar tan ba comunidade iha teritóriu tomak liliu comunidade área rurais kona-ba oinsa atu asesu ba justisa formál no halo prevensaun ba violénsia bazeia ba jéneru. JSMP sei esforsu-an atu kontinua fahe informasaun tuir rekursu ne'ebé mak iha hodi hasa'e koñesimentu comunidade nian," dehan Adjuntu Diretora JSMP, Sr. Casimiro dos Santos.

Reprezentante Xefe Suku Uma Quic, Sra. Severina A. Pinto agradese tebes ba JSMP tanba bele fasilita treinamentu ida ne'e iha sira nia suku no husu atu kontinua fahe informasaun hanesan ba comunidade ne'ebé la hetan oportunidade hanesan atu sira bele lori sira nia kazu ba iha justisa formál karik sira hasoru problema.

Treinamentu ne'e fahe ba sesaun haat (4) mak hanesan sesaun direitu umanu, violénsia bazeia ba jéneru, asesu ba justisa no serbisu assisténsia legál ba violénsia bazeia ba jéneru.

Iha sesaun materia, partisipante sira ativu teb-tebes no antusias hodi husu no hato'o sira nia preokupasaun sira. Iha sesaun materia, partisipante sira husu kona-ba

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

komunidade sira lakohi halo denúnsia ba krime violénsia doméstika tanba ta'uk ema dehan tau kanuru tohar ba ema nia problema. Sira mós husu kona-ba signifika husi pena multa no pena prizaun maibé suspende nia ezekusaun. Alende ne'e, preokupasaun seluk mak kona-ba prosedimentu husi kazu ameasa (tanbasá bele dada fali), no problema la'en fahe-malu ho feen no abandona oan sira.

Resposta ba pergunta kona-ba comunidade ta'uk apresenta denúnsia ba kazu violénsia doméstika, JSMP esplika lei (Kódigu Prosesu Penál) ne'ebé haktuir katak ema ne'ebé haree ka rona krime públiku ruma akontese bele halo denúnsia, enkuantu ba ajente polisia, funsionáriu públiku, autoridade públiku no ka jestór públiku iha obrigasaun atu halo partisipasan tuir lei, se sira la halo partisipasaun sira sei ba hatan krime ida ho naran la partisipasaun tuir lei penál no sei hetan kastigu 2/3 husi kastigu másimu no mínimu krime ne'ebé nia subar. JSMP mós esplika ba partisipante sira katak labele ta'uk atu denúnsia tanba ita iha ona Lei Protesaun ba Testemuña. Lei ne'e sei asegura seguransa ba testemuña sira nia identidade atu ema seluk labele hatene.

Kestaun kona-ba suspensaun ba pena prizaun, JSMP esplika katak suspensaun pena prizaun signifika arguidu nia kastigu prizaun suspende tiha. Arguidu sei la ba kumpri iha prizaun maibé hala'o de'it iha liur hanesan naha/todan ida ne'ebé tula hela ba iha arguidu nia kabaas no nia tutur hela ba mai. Se durante iha período suspensaun mak prátika tan krime, tribunál bele revoga tiha pena ne'ebé suspende ne'e no arguidu tenke ba kumpri iha prizaun no depois mak prosesu tan kazu foun ne'ebé nia halo iha período suspensaun nia laran.

Kestaun krime ameasa bele dada fali, JSMP esplika katak krime ameasa tuir lei nu'udar krime semi-públiku, signifika nia prosedimentu kriminál depende ba iha keixa no vítima mak iha lejitimidade atu dada, taka ka prosesu ba oin. Karik vítima konsente hakarak dala fali tanba di'ak malu ona ho arguidu, vítima bele husu atu dada fali mesmu kazu ne'e to'o ona iha tribunál. Alende ne'e, krime sira ho natureza semi-públiku admite atu rezolve iha nivél suku ka aldeia.

Kestaun kona-ba la'en fahe-malu ho feen no abandona oan sira, JSMP esplika katak la'en abandona feen no oan sira ne'e nu'udar kazu sivíl no kazu ne'e konsidera urjente no tenki lori kedan ba iha organizasaun sira ne'ebé fó assisténsia legál ba vítima violénsia bezeia ba jénaru hanesan JSMP, ALFeLa no VPU atu ajuda lori ba rejistu iha Ministériu Públiku atu prosesa tuir lei nune'e labarik sira bele hetan sira nia direitu ba alimentasaun husi sira nia inan-aman no bainhira inan-aman la halo tuir sira nia obrigasaun alimentár, inan-aman sei hatan ba krime ida ho naran la halotuir obligasaun alimentar tuir lei penál no sei hetan kastigu.

Iha sesaun treinamentu ne'e, partisipante sira mós rekomenda ba JSMP atu kontinua halo treinamentu hanesan ba arguidu no kondenadu sira husi krime violénsia bazeia ba

jéneru no comunidade sira, atu sira bele hatene lala'ok prosesu kazu iha tribunál no kastigu sira ne'ebé tribunál aplika ba kondenadu sira.

Atividade treinamentu ne'e realiza tanba hetan apoia orsamantu husi Uniáô Eropia liuhusi projetu Spotlight-UNDP.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)